

24. april 2019

UPA 2019/59

Meeqqat aturfiani digitalimut piorsaanerup taamatullu digitalimik atuinerup immikkut ilinniartitsissutigineqartalernissaat anguniarlugu inatsisissamut siunnersuummik saqqummiuseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliamut tassunga atatillugu Naalakkersuisut attavigissavaat Institut for Læring aamma kommunit siunertaralugu UV-mut atortunik naapertuuttunik ineriartortitsinissaq aamma ilinniartitsisutut ilinniagaqareersut ilinniaqqissinnaanissaat.

(Inatsisartunut ilaasortaq Randi Vestergaard Evaldsen, Demokraatit)

Demokraatit sinnerlugit Inatsisartuni ilaasortaq Randi Vestergaard Evaldsen siunnersuutaa Siumumiik imaattumik oqaaseqarfigissuarput.

Suna tamarmi digitalinngoriartorpoq, sumi najugaqarnermut uppernarsaatit, piniarnermut immersugassat, ilinniarnissamut qinnuteqarfissat, bankimi aningaasaatit il. il. Suut tamarmik digitaliserernejarnerat qarasaasiamik atuisunut oqilisaataavoq aammali innutaasut ilarpassinut ilungersunarsinnaalluni.

Nunatsinni innuttaasut amerlasoorpassuit Smartsphone-nik allanillu angallattakkanik qarasaasianik atuinerat annertusigaluttuinnarpoq. Qarasaasiaqarnikkut inerisaaneq kommunini pisortallu suliffeqarfiutaanni annertuumik ingerlanneqarpoq. Kommunit ilaasa atuartuutitik tamaasa angallattakkanik qarasaasialersorpaat atuartitsinermullu annertuumik atulerlugit. Malitsigisaanik ilinniartitsisunngorniat qarasaasiaq atorlugu atuartitsinnaaneq ilinniarnerminni ilanngullugu sungiusartarpaat.

Nunatsinni innuttaasut ima ikitsigivugut søkapelip piginnaasaanik atuinerput 1%-iinnaalluni nunarsuarmili aammalu nunatsinni qarasaasiamik atuneq annertusigaluttuinnarpoq. Taamaammat isumannaallisaaneq suli annerusumik ukkattuagassaavoq.

Nunat allat qanigisagut qiviarutsigit qarasaasiakkut atuartitsineq ilinniartitsinerlu annertusiartuinnartumik aalluppaat, ass. nunaqarfigisaq, illoqarfigisaq angerlarsimaffilluunniit qimanngikkaluarlugu nammineq sumiiffimmiik ilinniarneq ingerlanneqarsinnaavoq nunatsinni periarfissat aamma tamakku inerisarneqarlutik aallartipput.

Taamatut qarasaasiakkut ineriartortitsineq isorartussutsimi avinngarusimasumiittunilu aporfusartut annikillissavai, taamaammat digitaliseeriinermi periusissiaq 2018-2021-mut suliarineqarnikuusoq anguniagassanik assigiinngitsunik tikkuussisoq Siumumiik suleqataaffigissavarput.



Inatsisartut atuartitaanermut ilinniartitaanermullu ataatsimiititaliaat pãski sioqqutilaarlugu IMAK-imut tassa ilinniartitsisut Kattuffiannut pulaarpoq. Tassani ilisimatinneqarpugut IMAK isumaqartoq atuartitsissutit faagit ilaqqinneqarnissaat IMAK-imit kissaatigineqanngitsoq.

Meerartatta qarasaasiarsornikkut piginnaasaat qaffassartuartaqarpagut, taamaammat Siumumi isumaqarpugut minnerpaamik atuartut atuagarsornikkut ilikkagassaanni qarasaasiamik nalinnaasumik atuisinnaaneq piginnaaneqarfigilernissaanut aqqutissiuunneqassasut. Taamaammat Naalackersuisut allannguutissatut siunnersuutaat Siumumiik taparserparput tassalu atuartitaanerup ilinniartitaanerullu ataqatigiisumik aqqissuuteqqinneqarneranut atatillugu qarasaasiamik atuneq nalilersuilluni misissuinerumut inerisaanermillu suliaqarnermut ilaatinneqassasoq.

Siumumiik taamatut oqaaseqarluta Demokraatit sinnerlugit Inatsisartuni ilaasortap Randi Vestergaard Evaldsen siunnersuutaa ataatsimiititaliamut aappassaanerreqartinnagu ingerlatinneqassasoq innersuussutigaarput.

Doris J. Jensen